

**Uunga siunnersuut: Efterskolit aamma paarlaasseqatigiittarnermut tapiissutit pillugit
Inatsisartut inatsisaata allanngortinnissaa pillugu Inatsisartut inatsisaat
Ilinniartitaanermut, Kultureqarnermut, Timersornermut Ilageeqarnermullu
Naalakkersuisumit saqqummiunneqartoq**

pillugu

**Kultureqarnermut, Ilinniartitaanermut, Ilisimatusarnermut Ilageeqarnermullu
Ataatsimiititaliap**

siunnersuutip aappassaaneerneqarneranut

ISUMALIUTISSIISSUTAA

Ataatsimiititaliap suliarinninnermini ilaasortarai:

Inatsisartunut ilaasortaq Nivi Heilmann Efraimsen, Inuit Ataqatigiit, siulittaasoq

Inatsisartunut ilaasortaq Isak Johannessen, Naleraq

Inatsisartunut ilaasortaq Margrethe Thårup Andersen, Demokratiit

Inatsisartunut ilaasortaq Pipaluk Olsen, Demokratiit

Inatsisartunut ilaasortaq Anders Olsen, Siumut

UKA 2025 ulloq 30. september siullermeerinninnerup kingorna ataatsimiititaliap siunnersuut misissorpaa.

Siunnersuutip imarisaa siunertaalu

Efterskolit pillugit inatsisip nutarterneqarnissaa siunnersuummut pingaarnertut tunngaviuvoq.

Nutarterinerup immikkoortuani siullermi Savalimmiuni efterskolernermut aamma

Danmarkimi fagskolini namminersortuniinnermut tapiissuteqarsinnaanerit inatsisitigut

tunngavinnik pilersitsinissaq siunertaavoq.

Nutarterinerup immikkoortuata aappaani efterskolernermut inatsisip tamarmiusup nutarterneqarnera pineqarpoq. Inatsimmik nutarterinerup immikkoortunut marlunnut avinneratigut Savalimmiuni efterskolernermut aamma Danmarkimi fagskolini namminersortuniinnernut sukkanerusumik tapiinissamik periarfissaqartitsinerit qulakkeerneqarsinnaalissapput, tassami Inatsisartut inatsisaanik nalinginnaasumik nutarterineq 2027-p ingerlanerani aatsaat inatsisissatut siunnersuummi saqqummiunneqarsinnaalissasoq ilimagineqarmat.

Siunnersuutip Inatsisartuni siullermeerneqarnera

Inatsisissatut siunnertuut siullermeerinninnermi pitsaasumik qisuariarfigineqarpoq aammalu ataatsimiititaliami suliarineqartussanngorlugu Kultureqarnermut, Ilinniartitaanermut, Ilisimatusarnermut Ilageeqarnermullu Ataatsimiititaliamut innersuunneqarluni.

Tusarniaanermut akissutit

Siunnersuut piffissami 2. junimit 30. juni 2025 tungaanut tamanut tusarniaassutigineqarpoq. Tusarniaanermut akissutit tunniunneqartut inatsisissatut siunnersuummut kakkiunneqarput (ilangussaq 2), tamanna Inatsisartut Siulittaasoqarfiata ilusiliinissamut piumasaqaataanut naapertuulluni.

Siunnersuutip aningaasatigut kingunerisassai

Siunnersuutip piviusunngortinneqarnerani aningaasatigut kingunerisinnaasai siunnersuummut nassuiaatini nalinginnaasuni allassimapput. Tassani ima allassimavoq, aningaasanut inatsimmi konto pingaarnerup 40.10.12 Efterskolit ataani Danmarkimi efterskolini atuartut ukiumut 250-iunissaat naatsorsuutigineqartarput. Danmarkimi, Savalimmiuni efterskolinit imaluunniit fagskolini namminersortitaniinnissamut atuartut amerlassusiisa amerlinissaat ilimagineqanngitsoq naliliisoqarpoq. Atuartut Savalimmiuni efterskolerusuttut imaluunniit fagskolini namminersortuniikkusuttut Danmarkimi efterskolernissaminnik siumoortumik eqqarsaatersoreersimanissaat nalilerneqarput.

Siunnersuut atuartumut ataatsimut amerlanerusunik tapiissutinin kinguneqassanganneqanngilaq, Savalimmiuni efterskolernissamut imaluunniit fagskolini namminersortuniinnissamut Namminersorlutik Oqartussanit aningaasartuutaasussat Danmarkimi efterskolernissamut tapiissutinit aningaasartuutaasussat qaangerneqarnaviannngimmata.

Ataatsimiititaliap siunnersuummut oqaaseqaatissai

Inatsisissatut siunnersuut ataatsimiititaliamit tigulluarneqarpoq nuannaarutigalugulu Kalaallit Nunaanni inuusuttut Savalimmiuni efterskolernissamut imaluunniit Danmarkimi fagskolini namminersortuniinnissamut tapiiffigineqarnissamut aamma periarfissaqalissammata.

Ataatsimiititaliap inassuteqaatai

- Ataatsimiititaliap **isumaqatigiittup** siunnersuutip akuersissutigineqarnissaa inassutigaa.

Taama oqaaseqarluni isumaliutissiisummilu allassimasunut paasinnilluni ataatsimiititaliap siunnersuut aappassaaniigassanngortippaa.

Nivi Heilmann Efraimsen
Siulittaasoq

Isak Johannessen
Siulittaasup tullia

Margrethe Thårup Andersen

Pipaluk Olsen

Anders Olsen